

阿毗曇毗婆沙論卷第六十三 二三

迦旃延子造

北涼沙門浮陀跋摩共道泰譯

使捷度十門品第四之十

佛經說四禪是涼風問曰何故佛說四禪是

涼風答曰能除^{二三}止煩惱業熱故以初禪涼止

欲界煩惱業熱以第二禪涼止初禪熱以第

三禪涼止第二禪熱以第四禪涼止第三禪

熱佛經說四禪是食問曰何故佛經說四禪

是食答曰為滿法身故如村落中所有飲食

送向城者皆為長養城中諸人身身故如是禪

中所有善根皆為長養法身故

佛經說婆羅門當知第四禪是畢竟道問曰

何故佛捨三禪說第四禪是畢竟道答曰彼

婆羅門聞佛有一切知見復聞如來以第四

禪成阿耨多羅三藐三菩提說第四禪是畢

竟道便作是念若沙門瞿曇說第四禪是畢

竟道者必定有一切知見便詣佛所到已問

如是義佛知彼心所念便捨三禪說四禪是

畢竟道彼人聞已生決定心必有一切知見

婆羅門是亦名如來所行亦名如來現行法

譬如野象於夏中時見地生青茂花草及諸

池水心生欣躍以牙掘地然後安足如來亦

爾亦以四禪行捨掘所知地而安智足如來

道者是住舍摩他如來所行者是住毗婆舍

那如來現行法者是二俱住

佛經說四禪是樂住問曰何故佛說四禪是

樂住耶答曰以易生故樂根本禪以易生故

是樂諸邊及無色定以難生故是苦有何難

生耶答曰為欲界煩惱業所縛故未至禪難

生現在前如人牢固反繫其手多用功力然後自解如是爲欲界煩惱所繫縛故多用功力生彼地道現在前或有以不淨觀起彼地道現在前或有以阿那波那念者以不淨觀者或於十年十二年中修白骨想或有能起彼地者或有不能者以阿那波那念者或十年十二年中常數出入息或有能起彼地現在前者或不能者已斷欲愛不多用功力起初禪現在前異心滅起異心現在前麤心滅起細心現在前與覺俱心滅起與觀俱心現在前如人以木析木多用功力然後乃析如是初禪異心滅異心現在前麤心滅細心現在前與覺俱心滅與觀俱心現在前多用功力亦復如是若離初禪欲不多用功力起第二禪現在前離第二禪欲起第三禪現在前

離第三禪欲起第四禪現在前亦復如是問曰若離第四禪欲起空處現在前亦不多用功力何故不名樂道答曰以無色定微細故或有說無無色定如梨毗婆居士往詣尊者阿難所作如是說我是在家之人長夜樂著色聲香味觸聞說無色定心生怖畏如臨深坑云何衆生而無有色復次以行時樂故譬如二人俱欲至一方一從陸道二從水道雖俱到一方從水道行者樂從陸道行者苦如是無邊衆生得離欲時或依根本禪或依諸邊及無色定雖俱得離欲依根本禪者樂依諸邊無色定者苦復次若處所有二種樂謂受樂猗樂三禪中有二種樂第四禪中雖無受樂廣有猗樂勝於受樂復次有二種故一舊住樂二客樂舊住樂者如住禪起禪現在

前客樂者如住禪起無色定現在前復次此中有不惱害衆生樂可得故如說若不惱害他是名爲樂復次若起根本禪現在前則徧身四大柔軟若起諸邊現在前則繞心四大柔軟復有說者起諸邊現在前亦徧身四大柔軟但不如起根本禪現在前者譬如二人同一池澡浴一在其邊一入其中雖俱澡浴而入中者令四大潤益勝彼亦如是復次以有二法共在一處等俱生故二法者謂定慧也未至中間禪慧多定少無色定定多慧少根本禪生定慧等復次有二法等俱生故二法謂定精進精進雖一切地徧多以根本禪力故二法生時俱等復次斷有二種有多用功有不多用功諸邊無色定若有所斷則多用功根本禪若有所斷不多用功譬如二人

乘馬俱至一方一乘調者一乘不調者雖俱至一方乘調馬者不多用功乘不調馬者則多用功如是諸衆生離欲時或依根本禪或依諸邊無色定若依根本禪者不多用功若依諸邊無色定者則多用功復次以修道時得安樂故譬如多人渡河或因草束或因浮囊或因船或因舫雖從此岸俱渡到彼岸但乘舫渡者安樂彼亦如是以如是等事故佛經說根本禪是樂住如樂住觸住樂觸住亦如是四無量謂慈悲喜捨問曰何故禪次第三說無量耶答曰以無量從禪中生故復次以無量是禪中餘功德故以是事故禪次第說無量問曰無量體性是何答曰慈悲是無恚善根對治於恚取其迴轉相應共有法體性是四陰五陰欲界者是四陰色界者是五陰

問曰此二俱是無恚善根對治於恚慈對治何等恚悲對治何等恚耶答曰恚或有欲殺衆生者或有欲打衆生者若欲殺衆生恚慈爲對治欲打衆生恚悲爲對治復次恚有二種一者應恚處而恚二者不應恚處而恚慈則對治應恚處而恚者悲則對治不應恚處而恚者喜是喜根取其迴轉相應共有法體是四陰五陰欲界是四陰色界是五陰問曰若喜體是喜根者波伽羅那所說云何通如說云何爲喜答曰喜相應受想行識及從彼起身口業從彼起心不相應行是名爲喜爲受還應受耶答曰波伽羅那文應如是說喜相應想行識乃至廣說不應說受而不說者有何意耶答曰誦者錯謬故復次波伽羅那說無量體性是五陰雖不與受相應而與餘

二三

五

數法相應復有說者喜自有體是心數法與心相應或有說者是喜根心數聚中可得或有說者是喜根後生捨是無貪善根對治於貪取其迴轉相應共有法體是四陰五陰欲界是四陰色界是五陰此是無量體性已說體性其相云何答曰體性即是相相即是體性諸法不可捨於體性別更說相尊者和須密說曰饒益相是慈除不饒益相是悲隨喜相是喜放捨相是捨已說無量體相所以今當說何故名無量無量是何義答曰對治戲論故名無量問曰若對治戲論是無量者戲論有二種一愛戲論二見戲論以何等無量對治何等戲論答曰無量不能斷結或以無量對治於愛或以無量對治於見若取其近對治者慈悲是見近

對治所以者何見行衆生多喜瞋恚喜捨是
愛近對治所以者何愛行衆生多喜相親近
復次對治放逸法故名無量放逸者是欲界
諸煩惱誰是其近對治謂四無量復次是賢
聖所遊戲處名爲歡喜如富貴人有種種遊
戲處如園林姝女遊獵等名歡喜處彼亦如
是界者在欲色界地者慈悲捨十地中可得
謂根本四禪四禪邊欲界禪中間喜在三地
欲界初禪二禪復有說者初禪第二禪無悲
所以者何初禪第二禪喜是自地受喜根是
欣踊行悲是憂感行若初禪第二禪有悲者
則一心聚中有欣踊行亦有憂感行問曰初
禪第二禪無無漏馱行耶答曰無漏馱行是
實觀隨其實觀心則生喜隨其生喜則欲更
知如人爲寶故掘地隨其掘地則便得寶隨

二三

六

其得寶復欲更掘彼亦如是非是虛觀評曰
應作是說初禪第二禪有悲所依者依欲界
行者慈是樂行悲是苦行喜是歡喜行捨是
放捨行緣者盡緣欲界緣聚緣衆生緣欲界
五陰二陰衆生若緣住自心衆生則緣五陰
若緣住他心及無心衆生是緣二陰復有說
者初禪無量緣於欲界第二禪無量緣欲界
初禪第三禪無量緣欲界初禪第二禪第四
禪無量緣欲界初禪第二第三禪復有說者
初禪無量緣欲界初禪乃至第四禪無量緣
欲界乃至第四禪復有說者慈緣欲界初禪
第二第三禪所以者何慈行樂行欲界三禪
中有樂受故悲緣欲界所以者何悲行苦行
欲界中有苦受故喜緣欲界初禪第二禪所
以者何喜行歡喜行欲界初禪第二禪有喜

根故捨緣欲界乃至第四禪所以者何捨行
放捨行欲界乃至第四禪有捨故評曰如前
說者好無量盡緣欲界緣聚緣衆生念處者
盡與法念處俱智者盡與等智俱三昧者不
與三昧俱根者總與三根相應謂樂根喜根
捨根世者是過去未來現在緣三世者過去
緣過去現在緣現在未來必不生者緣三世
必生者緣未來善不善無記者是善緣善不
善無記者三種盡緣是三界繫不繫者是欲
色界繫緣三界繫不繫者緣欲界繫學無學
非學非無學者是非學非無學緣學無學非
學非無學者緣非學非無學見道斷修道斷
無斷者是修道斷緣見道斷修道斷不斷者
緣見道修道斷緣名緣義者二俱緣緣自身
他身及非身者是緣他身為是離欲得為是

方便得者是離欲得亦是方便得離欲得者
離欲界欲得初禪者離初禪欲得第二禪者
離第二禪欲得第三禪者離第三禪欲得第
四禪者離第四禪欲得者為是新得為是本
得者亦是新得亦是本得聖人最後身凡夫
亦是新得亦是本得餘凡夫唯是本得方便
得者以方便故起現在前佛不以方便起現
在前辟支佛以下方便起現在前聲聞或以
中方便或以上方便起現在前
問曰云何生起無量耶答曰慈因親分生行
者欲起慈心時一切衆生盡作三分一作親
分二作怨分三作非親非怨分復作三種
種謂下中上怨分亦爾非親怨分惟作一種
上親分中有重恩者謂父母和尚阿闍黎及
餘尊重處智慧梵行者於彼衆生先作樂觀

此諸衆生皆令得樂此心堅強難調以從無始以來常習惡心於諸衆生故雖有如是重恩衆生猶不能令善心使住復強還迴此心令住彼法譬如有人以芥子打於錐鋒甚難可住習打不已後乃得住彼亦如是若能觀此上親衆生皆令得樂次觀中親衆生次觀下親若能都觀親分衆生皆令得樂次觀非親非怨分者次觀下怨次觀中怨次觀上怨衆生欲令得樂若能如是觀一切衆生皆令得樂如上親衆生於上怨衆生等無有異是則成就於慈悲喜亦爾捨因非親非怨衆生起所以者何捨親者生愛心捨怨者生恚心是故先捨非親非怨衆生次捨下怨次捨中怨次捨上怨所以者何恚心易却非愛心故次捨下親次捨中親次捨上親若於一切衆

生能作如是捨觀者心則平等無所分別其猶如稱如觀樹林無有差別觀諸衆生亦復如是是則成就捨心

問曰何等人能起無量何等人不能起無量

答曰人有二種一者喜求人過二者喜求人善若喜求人過者不能起無量所以者何乃至於阿羅漢身猶求其過爲有何破何實何垢令我呵之若喜求他善者則能起無量所以者何乃至於斷善根人邊猶求其善問曰斷善根人無有諸善云何於彼人邊求其善

耶答曰雖無現善有過去善業報令其身端正生於豪族言有威德多聞機辯取如是等相生於善念彼行妙好有如是果報

問曰此四無量爲如說而生爲說異生異答曰或有說者如說而生所以者何行者先欲

饒益衆生饒益衆生相是慈是故世尊先說
慈心次除不饒益除不饒益相是悲是故世
尊次慈悲若與饒益除不饒益次生歡喜歡
喜相是喜是故世尊最後說捨復有說者行
捨相是捨是故世尊最後說捨復有說者行
者先起悲後起慈喜捨所以者何先除衆生
不饒益事後與饒益次生喜次生捨尊者僧
伽婆修說曰二無量展轉相御若先起悲次
必起喜所以者何悲是憂感喜是歡喜若先
起喜次必起悲所以者何喜是掉悲則制之
評曰應作是說無量不如說而起所以者何
行者或有先起慈乃至捨或有先起捨乃至
慈或有得慈不得餘者或有乃至得捨不得
餘者無量無有順次逆次順超逆超如解脫
除入一切入彼亦如是

問曰慈次第能起悲喜捨不耶答曰定捷度
說云何心念慈三昧答曰衆生樂乃至云何
心念捨三昧答曰衆生捨或有說此文是俱
生行或有說是次第緣行若說是俱生行者
慈次第能起悲喜捨若說是次第緣行者慈
次第不能起悲喜捨問曰若不起初禪地無
量能起第二禪地無量不耶乃至不起第三
禪地無量能起第四禪地無量不耶答曰或
有說者不能所以者何初禪地無量是第二
禪地無量方便門所依乃至第三禪地無量
是第四禪地無量方便門所依故復有說者
能若行者於彼地得自在者即依彼地能起
無量現在前問曰爲初禪地無量後生第二
禪地無量疾乃至第三禪地無量後生第四
禪地無量疾耶爲第四禪地無量後生第三

禪地無量疾乃至第二禪地無量後生初禪地無量疾耶答曰第二禪地無量後生初禪地無量疾乃至第四禪地無量後生第三禪地無量疾非初禪地無量後生第二禪地無量疾乃至非第三禪地無量後生第四禪地無量疾如人先學梵書後學佉樓書疾非先學佉樓書後學梵書疾問曰初禪地無量次第能生第二禪地無量不耶乃至第三禪地無量次第能生第四禪地無量不耶答曰或有說者能初禪地無量次第生第二禪地無量乃至第三禪地無量次第生第四禪地無量復有說者不能所以者何無量必須方便方便必以自地相似方便起慈乃至起捨觀有三種一別相觀二總相觀三虛相觀別相觀者如觀地是堅相觀水是濕相觀火是

三三

十一

熱相觀風是動相總相觀者如十六聖行俱觀虛相觀者如不淨安那般那念無量念解脫勝處一切入俱觀無量於三種觀中是虛相觀問曰行者觀衆生樂時爲以何處樂令衆生樂耶答曰或有說者以第三禪樂所以者何第三禪樂是一切生死中最勝樂故若作是說不起第三禪者則不能起無量復有說者過去世曾得第三禪樂以第三禪地念前世智觀彼樂已以彼樂令衆生樂若作是說若不得第三禪地念前世智則不能起無量復有說者以近所更樂如飲食樂乘樂衣裳樂卧具樂以如是等樂相令衆生樂尊者和須蜜說曰行者以何等樂令衆生樂答曰衆生有樂者以如是相令衆生樂若作是說慈則

不能緣一切衆生所以者何一切衆生不必有樂復次衆生有樂根以如是相令衆生樂若作是說慈則不能緣一切衆生所以者何一切衆生不能於一切時起樂根現在前故復次衆生有飲食樂乘樂衣裳樂卧具樂以如是樂相令衆生樂若作是說慈則不能緣一切衆生所以者何一切衆生不必盡得如是樂故尊者佛陀提婆說曰以所知見樂取如是相以憐愍心令衆生樂如本方便時若依村住若依城住以日前分若入城村乞食見純受樂衆生或乘象馬車輿而行或著耳璫珠環或以種種瓔珞嚴身猶如天子或見純受苦者如無衣裳飲食頭髮鬢亂手足破裂執破瓦器從他家乞取如是樂苦衆生相速還住處洗足於所坐處結跏趺坐令身心

三

十二

柔軟身無障礙心無障礙觀先所取相衆生樂者常令得樂衆生苦者令得先所見樂問曰所觀衆生不盡得樂云何此觀非顛倒耶答曰以其善故非是顛倒從饒益心起故從善心起故從憐愍心起故從正觀心起故與善根相應故與慚愧相應故非是顛倒顛倒有二種一體顛倒二緣顛倒彼觀雖是緣顛倒非體顛倒尊者和須蜜說曰不以住慈故令衆生樂但以此法作方便能制恚斷結尊者佛陀提婆說曰此觀當言不顛倒所以者何與恚相妨故佛經說若以無怨無恚無害慈心善修此心令廣大無量如是觀滿一方二方三方四方上方下方亦復如是皆以慈心觀一切處一切衆生問曰此慈緣於衆生何以說滿於一

方耶答曰此經文應如是說若以無怨無恚無害慈心善修此心令廣大無量如是觀滿東方衆生南方西方北方衆生乃至廣說而不說者有何意耶答曰此中衆生以方名說如以器示器中物皆以慈心觀一切處一切衆生者問曰此無量觀爲以方段爲以衆生若以方段者此說云何通如說皆以慈心觀一切處一切衆生若以衆生者云何非得衆生海邊耶答曰或有說者以方段故問曰若然者此所說云何通如說皆以慈心觀一切處一切衆生答曰有二種一切有一切一切有少分一切此中說少分一切復有說者以衆生故問曰若然者云何非不得衆生海邊耶答曰若以此事得衆生海邊者復有何過但衆生海邊可得以總故非別相如一切衆

生皆是四生四生之外更無衆生復有說者佛無量盡衆生邊聲聞辟支佛無量以方段復有說者佛辟支佛無量盡衆生邊聲聞無量以方段評曰應作是說此事不定所以者何此是虛相觀或有盡衆生邊際者或有以方段者問曰爲觀一衆生樂爲觀多衆生樂答曰初起時觀多衆生所以者何無量是緣聚緣衆生法若後成滿時亦緣一衆生亦緣多衆生佛經說諸比丘我於七歲中修習慈心故七經劫成壞不來生此間世界壞時我生光音天世界成時我生空梵世中我曾爲大梵天王諸梵中尊無勝我者於千世界而得自在三十六反爲帝釋亦於無量世作轉輪聖王主四種兵常以正法降伏衆生成就七寶乃

至廣說七歲中者謂七雨時古世好時菩薩
爲中國王彼國多熱去城不遠有林其地高
涼生華果草木及諸流水皆悉具足夏熱之
時城中村落人民皆捨居處趣彼林中各修
所業菩薩亦爾更以餘人鎮守於城自詣林
中於高顯閑靜處離欲界欲起二四無量於夏
雨四月中遊四無量心夏熱已過天時轉涼
是時人民捨彼樹林還詣居處各修所業爾
時菩薩亦捨樹林還詣宮城以憐愍故設大
法祀修布施福業施沙門婆羅門諸貧窮作
業者及行道人有來求者施其飲食衣服塗
香房舍卧具象馬車乘及施燈明如是六反
往林中或有說者第七反菩薩命行盡命終
生光音天或有說者遭世界壞命終生光音
天是故於七雨中名爲七歲問曰若生梵世

光音天中可爾所以者何是彼果是色界繫
故言作帝釋轉輪王者云何可爾無量亦於
欲界中受報耶答曰菩薩起三地無量謂欲
界地初禪地二禪地受欲界地無量報作轉
輪聖王帝釋受初禪地無量報作大梵王受
第二禪地無量報生光音天復次欲界有無
量出定入定心受出入定心報故作轉輪聖
王帝釋受無量報故生梵世光音天中復次
欲界有無量方便受方便報故作轉輪聖王
帝釋受無量報故生梵世光音天中復次欲
界是一切善根種子界一切善根乃至滅定二
皆有相似法受無量善根相似報故作轉輪
聖王帝釋受無量報故生梵世光音天中復
次受法祠祀報故作轉輪聖王受持戒報故
作帝釋受彼林中修無量報故生梵世光音

天中復次此經說三種福業謂布施持戒修定福業如彼經說諸比丘我以三業報故令我有大威勢三業者謂施定戒施者是布施福業定者是修定福業戒者是修戒福業以布施福業報故作轉輪聖王以持戒福業報故作帝釋以修定福業報故生梵世光音天中

佛經說有三種福業謂布施福業持戒福業修定福業云何布施福業若以物施沙門婆羅門乃至燈明是名布施福業云何持戒福業不殺於殺更不欲殺不盜不姪不妄語不飲酒亦如是是名持戒福業云何修定福業常以無怨無恚無害慈心廣說如上悲喜捨心說亦如是是名修定福業問曰何故色無色界善根唯說無量是修定福業非餘色無

色界善根耶答曰世人以饒益為福想一切色無色界善根欲饒益他無有如無量者復次世人以福果為福想無量能生廣福果故如偈說

福火不能燒 風不能吹壞 能浮大地水

亦復不能漂 國王若盜賊 雖作諸方便

終不能劫奪 男子女人福 福藏最堅牢

終無有亡失

問曰如非福火亦不能燒何故但說福耶答

曰非福雖不燒燒非福果無量果不已為火

燒不當為火燒二二不今為火燒十六

阿毗曇毗婆沙論卷第六十三

音釋

析先的切
 斫破木也
 舫方甫安切
 輿羊也切
 獵逐力也
 璫都郎切
 感倉歷切
 擊蒲紅切
 鋒府容切
 銳也
 與也
 璫耳珠也
 擊也
 亂切也